

天台山全志

天台山全志卷十四

楚郢張聯元覺菴輯

賦

孫

綽

字興公爲章安令永和  
中王羲之引爲右軍  
長史轉永嘉太守作天  
台賦范榮期見之曰

此賦擲地必  
作金石聲

天台山賦

并序

天台山者蓋山嶽之神秀也涉海則有方丈蓬萊登  
陸則有四明天台皆元聖之所遊化靈仙之所窟宅  
夫其峻極之狀嘉祥之美窮山海之瑰富盡人神之  
壯麗矣所以不列于五嶽闕載于常典者豈不以所

立冥奧其路幽迥或倒景於重溟或匿峰於千嶺始  
經魑魅之途卒踐無人之境舉世罕能登涉王者莫  
由禋祀故事絕於常篇名標於奇紀然圖像之興豈  
虛也哉非夫遺世翫道絕粒茹芝者烏能輕舉而宅  
之非夫遠寄冥搜篤信通神者何肯遙想而存之余  
所以馳神運思晝詠宵興俛仰之間若已再升者也  
方解纓絡永託茲嶺不任詮想之至聊奮藻以散懷  
太虛遼廓而無闕運自然之妙有融而爲川瀆結而爲  
山阜嗟台嶽之所奇挺實神明之所扶持蔭牛宿以曜  
峰託靈越以正基結根彌於華岱直指高於九疑應配

天於唐典齊峻極於周詩邈彼絕域幽邃窈窕近智者  
以守見而不之之者以路絕而莫曉晒夏蟲之疑冰整  
輕翻而思矯理無隱而不彰啓二奇以示兆赤城霞起  
以建標瀑布飛流以界道覩靈驗而遂徂忽乎吾之將  
行仍羽人於丹丘尋不死之福庭苟台嶺之可攀亦何  
羨於層城釋域中之常戀暢超然之高情被毛褐之森  
森振金策之鈴鈴披荒榛之蒙籠陟峭嶠之崢嶸濟楫  
溪而直進落五界而迅征跨穹隆之懸磴臨萬丈之絕  
冥踐莓苔之滑石搏壁立之翠屏攬樛木之長蘿援葛  
藟之飛莖雖一冒於垂堂乃永存乎長生必契誠於幽

跡履重險而逾平旣克濟于九折路威夷而修通恣心  
日之寥朗任緩步之從容藉萋萋之織草蔭落落之長  
松觀翔鸞之齋齋聽鳴鳳之嚶嚶過靈溪而一濯疏煩  
想於心胸蕩遺塵于旋流發五葢之遊蒙追羲農之絕  
軌躡二老之玄踪陟降信宿迄于仙都雙闕雲竦以夾  
路瓊臺中天而懸居珠闕玲瓏於林間玉堂陰映於高  
隅彤雲斐亶以翼孺皦日炯晃於綺疏八桂森挺以凌  
霜五芝含秀而晨敷惠風佇芳於陽林醴泉涌瀦于陰  
渠建木滅景于千尋琪樹璀璨而垂珠王喬控鶴以沖  
天應真飛錫以躡虛聘神變之揮霍忽出有而入無於

是遊覽既周體靜心閒害馬已去世事都捐投刃皆虛  
目牛無全凝思幽巖朗詠長川爾乃羲和亭午遊氛高  
蹇法鼓琅以振響衆香馥以揚煙肆覲天宗受集通仙  
挹以元玉之膏漱以華池之泉散以象外之說暢以無  
生之篇悟遣有之不盡覺涉無之有間泯色空以合跡  
忽卽有而得玄釋二名之同出消一無于三幡恣語樂  
以終日等寂然于不言渾萬象以冥觀兀同體於自然

白玉蟾

號瓊瑤本姓葛名長庚

### 天台山賦

天台之山神仙景象周迴八百餘里高聳萬八千丈實

金庭之洞天乃玉京之福壤霓裳羽節之隱顯有無天  
籟雲璈之清虛嘹唳赤烏吳王之脩崇景雲睿宗之興  
創琳宮藥殿而壯麗千載煙嶠松崖而瑰奇萬狀雲隨  
羽客在瓊臺雙闕之間鶴唳芝田正桐柏靈墟之上丹  
元真人之身居赤城左極仙翁而坐斷翠屏衆妙臺空  
而曠古陳迹法輪院在而何年授經藤蘿葛蔓而夜月  
照白蒿莽荆藜而曉煙鎖青勢吞吳越而峻極紫霄見  
彼柳使君之什地接蓬萊而臨滄海形于韓擇木之銘  
千丈瀑布而上跨石橋萬頃雲華而橫書佛隴三井龍  
蟠而水激石吼九峰虎嘯而風生樹壅紫檜封丹兮老

幹不死碧泉漱玉兮飛流自湧玄璵蒼武之怪石天成  
黃精白朮之靈苗仙種列苔剔莓而尋訪真迹斬竹縛  
茅而逃其俗冗昭慶院法輪院雲間之雞犬相聞元明  
宮洞天堂煙深之樓臺爭聳知天開地闢之久矣信神  
剏鬼劃之奇哉萬頃碧琉璃之水千層青翡翠之崖風  
響笙響而子晉何在花香水香而劉郎不回月洞風林  
之野鶴夜唳雲溪月隴之山猿曉哀幽鳥一聲兮花落  
青澗飛螢數點兮露沾蒼臺丹霞飛華頂之峰援天峻  
極紫霧鎖方瀛之路峭壁崔嵬椿庭檜殿之金磬鼓風  
竹院松齋之玉琴弄月翠檻丹楹兮山叅藻梲碧眼蒼



昔兮星冠羽褐丹爐灰冷而久已不火仙蛻壇高而知  
誰換骨金漿玉醴兮泉冽石髓瓊樹琪林兮花開春雪  
靈峰古寺之或顯靈異古德聖僧之相傳衣鉢寒山拾  
得興國清之伽藍智顛普明起定光之法窟釋子耘藥  
仙翁種茶春紉素蘭而秋摘黃菊曉吸元露而暮餐赤  
霞倚松長嘯而落月悲鶴採芝歸來而斜陽噪鷓唐有  
甘泉而坐此翠石漢有高察而隱于白沙憑雲翼於岑  
頭種玉蓮而結子徐默希于巖頂栽鐵樹以開花文章  
不療山水癖身心每被溪山縛躡芒屨而杖蒼柯披麻  
篔而戴青箬攜黃庭而歸冲嗇之菴吟洞章而登凌虛

之閣野鳥鳴嚶嚶山花開灼灼玉霄峰上水鳴咽華琳  
峰前雲寂寞煙駕浮空天渺渺空翠舞簫韶雲輶入洞  
風冷冷洞門無鎖鑰登翠微而望香林陟紫霄而顧玉  
泉仙花靈草而蒼翠無邊千巖萬壑而森羅目前吟李  
白天台之詩賡張籍天台之篇塵襟俗垢俱洗盡兩袂  
飄飄身欲仙我欲駕青龍而呼白鶴乘風飛去瀛洲之  
外方丈之巔

陳王謨

字虞佐號東谿康熙壬辰進士官翰林院庶  
吉士著有退學齋集

遊天台山賦

歲在甲午東谿子爲浙東之遊望吳山而遙往涉錢塘

之安流過會稽而訪蘭亭溯曹娥而想遺休徘徊剡溪  
之曲逡巡訪戴之舟山高水清曠焉忘憂於斯時也則  
有見夫連山彌漫而逶迤羣峰峭拔而聳峙遙而望之  
障闕雲霧而蔽虧日月者千巒萬嶂不知其幾猗歟休  
哉是蓋所謂天台之山其高萬八千丈周圍八百里興  
公之所臥遊神仙之所棲止矯焉身輕興不能已爰納  
雙屐扶孤筇登金庭之秀削攬天姥之穹窿趨關嶺與  
會墅經斑竹之菁蔥山光翠色予迎予逢視一峰之巋  
然如城圍而郭連當午而紅雲耀日未夕而丹崖蔽天  
洵赤城之偉觀有霞標之高懸乃陟高原踴躍攀緣巖

分上下境極幽元清能絕俗靜可忘年逍遙洞谷蓋竹  
連綿玉京之字非磨非鐫倚孤塔以凝眸思飛騰而高  
騫緬桐柏之璇宮實歷代之欽崇司馬於焉棲遲僕躬  
於此專封瑤臺瓊宇櫛比鱗次克拓於其中始信宿以  
遙征竟荒原而一空惟九峰之環繞看翠色之龍從瞻  
荒祠於墨胎仰百世之清風有聖像之獨存無二氏之  
遺踪洵道德之不朽彼異說之奚庸爰信步以攀躋見  
瓊臺與雙闕儼帝居之尊嚴命羣峰使奉職望峰巒之  
疊翠勢玲瓏而突兀窈矯迴互紛錯布列疎秀之容幽  
奇之態千怪萬狀而難以概測於是陟崇岡遵脩阿尋

桃源之故蹊訪古洞於荒蕪杳聞寂其無人笑流杯兮  
仙姝緣何客於半載徒分手而踟躕彼好事之飾說事  
遂冠乎此都若夫造物之巧厥有石梁雙溪所匯蜿蜒  
迴翔勢欲趨於一壑將一瀉而莫量何天工之設技倒  
巨石於中央倏鎖喉而扼吭逞變態於神奇長虹臥波  
而跳躍萬馬出谷而喧嘶雷闐闐以吼怒地搖搖以險  
巖欲比擬而難以徒目眩以驚疑斯固巨靈之得意而  
心目爲之恬怡於是志存遐思足隨幽討躡磴攀藤造  
極雲表或俯或仰倏登縹緲上華頂而身輕過拜經而  
目眇眇滄海與錢塘收千里於一際招天姥與括蒼看

拜舞而泐小天風倏其蓬蓬疑此身之何來觀日月之  
出入羲和於焉弭節而徘徊捫星辰之倒懸聞天籟之  
喧阗神飛骨聳目蕩心摧見煙雲之有無覺身世之可  
哈苟茅蓬之可借又何羨乎方丈與蓬萊他如闕號寒  
風峰名八桂玉霄葛閭之壘嶂重崖金地藤公之梯天  
陡銳山隍摘星顧歡高察之怡情忘世明巖寒巖其爲  
探幽挹翠者靡可得而意計數其梵宇則崇善國清方  
廣高明天封天柱萬年太平寒山拾得之所顯跡五百  
應真之所游行亦有浮屠舍利貝葉名經上方珍錫貨  
寶崢嶸代興代廢禪伯之所爭名其土則生仙葩瑤草

琪樹金松山礬巖桂卷柏梧桐茯苓根子木分蒼紅萬  
歲之藤百丈之楓肉芝藏於石穴青羊見於虞洪是皆  
南土之物產而靈山之所獨鍾更有青溪槽溪南輿響  
山雙溪玉女澎湃潄潄紆徐屈曲往復迴環一源萬派  
經絡於萬山之間觀者忘機聽者神閒遂乃容與徜徉  
心賞目說偃仰從容可以窮年而累月彼兩高盡於西  
湖山陰祇見道邊秀曲惟武彝最勝詭奇則雁宕稱妍  
惟天台之聳秀干霄標奇奪目實兼諸山之全雖未列  
於明禮已足包含衆有而冠越乎海天斯幽情之所愜  
聊抒辭以成篇甫伸紙而濡毫神恍惚乎茲山之巔

顏允珏

卷八 人字 遊玉著有覆鸞集

天台山賦

并序

昔孫綽與白玉蟾俱作天台山賦而孫賦尤著雄文  
擲地聲作金石展卷循還如陟靈境維時圖像雖興  
灌樹未闢馳神遠想未窮巖壑摛辭則藻麗彌工繪  
景則闕焉莫備予家四明壤接赤城想慕茲山歷有  
年所用踰重岡載宿始豐捫蘿歷磴快焉忘疲因賦  
所見以貽同好云

若夫北枕四明南通鴈蕩右聯蒼嶺之嵯峩左倚滄溟  
之澹沆其中有山焉密護八重高踰萬丈穹窿率律給



衍塏埭絮三山于海外兮與五嶽以同賞錫名曰天台  
兮寔女牛之分壤羨五嶽之勝遊兮少文尚存乎夢想  
豈台山之不可梯兮擬奮然而一往於是數洞天之瑰  
異首嶙峋之赤城揆丹砂于絕巘樹漢幟于青冥愛兩  
巖之肯綮御清風而上征濯予足于金錢兮振予衣于  
玉京此台嶺之南門兮實養真之福庭載東囊滕聿詢  
巖磴疇標四絕之名直入萬松之徑靈禽矯翼以高騫  
祥雲排霄而橫亘插浮圖于晴暉冷仙竈于夕暝悲舊  
蹟于陳隋鮮芳遺而馥賸躡棲雲以寫心度迴瀾而爽  
目澗水碧其淙淙松風勁而謾謾仰金地於天半蹇攀

躋而躑躅曲磴巖業層巒聳聳大慈擇秀于槃阿高明  
標奇于林麓神飛揚而超越路礫礪而西東客擔簦兮  
繭足僧抱鉢兮扶筇乃有岡橫巨石關號寒風衣袂凜  
冽樵牧斷踪神恟恍以難稽兮前路欲破乎鴻蒙憶陳  
迹以長嘯兮問太常之所憩書堂慨其間寂兮已雲關  
之久閉何林木之葳蕤兮靈墟經始于智顛卜老叟以  
結廬兮盤石撐天而鼉屨涉雙溪而凌天柱兮路逼仄  
而神悚羗濟勝寧無具兮望危峰以賈勇息影招提兮  
浩氣龍從萬山翔舞兮北辰是拱儼太華之屹然向天  
門以獨聳登華頂兮身一葉數千里兮窮一睫徘徊乎

禮經之臺徙倚乎降魔之塔顧東海其如杯指滄江其  
可吸惟摘星其擘翼兮呼澄深而響答龍公則四明蟬  
聯金庭則剡溪水接搔首于萬八千丈之巔兮通帝座  
而渺六合爰循昔路徑轉方廣經察嶺而西下忽神怡  
而目朗非人間之泉石異塵寰之嵒岫忽焉殷殷磴磴  
聲隨蠟屐訝鐘鼓之鏗吟倏驚雷之霹靂爰有飛瀑高  
懸危流奔澍素車夜騰銀河晝白注萬仞之寒潭駕連  
卷之彩霓夫其石梁之爲狀也蚴蟉夭矯龍形龜脊長  
亘數尋廣不盈尺莓苔鱗鱗下臨絕壁盼彼岸之璇房  
敢微軀以一擲知不可平逕度有蕩魂而悸魄乃訪蓋

竹應真是招緣溪歷澳厥有斷橋森森危石湍激雲搖  
游屐之所罕至藉問逕乎芻蕘越陵阜而一望平田洵  
可以掩畱雙間滯滌而蒼翠八峰環遶以嵯嶢妙蓮縱  
溼于蔓草兮精廬尚傍乎丹青巨杉鬱其偃蹇陟危岑  
于羅漢笑鐵船之不可棹兮慮流波之澎湃易芒履以  
前驅雖荆榛其何憚則有瓊臺兀立于大壑之心兮玉  
爲質而雲爲幔峭壁懸其三而兮光陸離而璀璨雙闕  
是抱金爐作案俯千仞之龍湫聽潺湲而冥駒雖猱毅  
之輕剽猶愕眙而股顛惟仙侶其堪居信丹砂之可鍊  
望桐柏于咫尺兮果攢峰而繡嶺亭亭明玉女之妝灼

灼護蓮花之影孰營不死之鄉孰闢朝真之境証劫灰  
其未然悼黃雲其已冷嘗透瓶于一勺兮窮翠屏之三  
井其下懸爲白練兮恍佇真之清迥憶觀宇于當年兮  
何砂礫其交并深山與人無求兮亦滄桑其可省求仙  
子于人間報桃源其不遠疇棹入于武陵羨當年之劉  
阮笑繽紛其來迎下雙娥之婉孌餐仙府之煙霞聽雲  
中之雞犬循鳴玉之琮琤兮疑珮環之欲返東峰青于  
螺黛兮恍曉鬟之在眼試通情于蹇脩兮申余情之欸  
欸何空洞之杳窳兮竟芳踪之泯泯過白巖而歷孟湖  
兮眺三峰其崛起四山環如郭廓兮驚寒石之譎詭嵌

空玲瓏兮明巖對啓攀龍鬚之瑣璫兮懸水索之纏纒  
洞有潛真兮實三隱之所止馬影隱躍兮又閭丘之遺  
趾返紫凝以尊危瀑兮求大茗于崇阿幸廣巖之不遠  
今一錢尚識乎貧婆回驛路于松關兮酬清夢于煙蘿  
山博換其彌佳兮忘嶺石之陂陀踰天姥而逍遙兮聞  
空中之鼓歌支竺于此是處王謝于此相過緬丹池赤  
水其在望兮卽蓬萊方丈其焉加斯亦盡游觀之瑰麗  
奚必再覓乎靈槎至於風軒月榭紺殿茅菴蒼藤捲霧  
尚帶飛嵐疎鐘遠徹夫邃谷幽棲足老夫瞿曇其環列  
于八重之內者固不得而盡探又若五老鄰卓劍之峰

沃洲開養鶴之塢東掖有隔塵之洞天門實藏丹之府  
鷓鴣矯矯而欲飛鳳皇翩翩而如舞歷藤公兮相羊攀  
筋竹兮容與其棊布於五界之中者並難得而覩縵若  
夫鶯啼燕語春風未闌猿驚鴈落霜葉初丹共伊人兮  
佩菊同幽客兮紉蘭又或陰崖古洞脩篁蔽天珠簾不  
卷六月生寒梅花正放帶雪增妍吟招隱以永日披鶴  
氅以忘年珍木離奇兮異卉璘璠杜鵑聯柯於喬樹鶴  
翎分彩于紅雲湛露流金松之液碧珠畱琪樹之英莫  
不錦舒綺錯狎獵氤氳况乎面面璿房重重金闕仙餌  
靈苗可採可啜紫芝香茅黃精紅朮茯苓千年菖蒲九

節飯以胡麻餐以桃寔吞石髓以療饑漱醴泉而愈疾  
以故白鶴下茅盈之駕桐柏結子喬之轍孝先于此修  
真司馬於焉解紱訝曇猷之滌腸快豐干之饒舌予亦  
欲童顏之久駐兮覓良師于仙窟巢許未聞其買山兮  
應衡茅之可乞亂曰峩峩台山聿聚仙真丹爐藥室藏  
于白雲使伊人其可作兮予亦將猿鶴以爲羣

王祖澤

臨海人字德芳本姓陳卽函輝曾孫

天台山賦

粵有茅君翱翔上清班分香案神怡玉京統三十六天  
之冊籍開萬八千丈之菁英簡墨胎而僕射繼天寇以



效靈繡錯乎須女之野光燭乎三能之皇緬孝先之遁  
跡兮煉黃芽與白雪命子晉而主治兮閒控鶴而吹笙  
猗神靈之窟宅極造化之裁成觀其祖黃嶽父括蒼天  
姥孕秀華頂高張俯下方之雨腳對如拳之星芒任暮  
靄朝嵐之變化懸金烏玉兔而低昂涉視齊州之九點  
恍登天柱于崑岡懷徵君兮察嶺之上尋福庭兮靈墟  
之旁至若斷橋積素雙闕凌空玉山高竝帝座疑通瓊  
臺遙集夫青鳥石梁怒走乎白虹青溪碧比瀟湘曲桐  
柏啓以金庭宮紫凝烹陸羽之水歡溪覓顧氏之踪攀  
翠嶺而逆遞駭赤城之龍控其天冠氏之塞門布紫抑

魏夫人之錦帳翻紅氍猷浣穢非于井側智顛禮貝葉  
于臺中赤幟揚夫霞綺百雉藉乎雲封見梵刹浮圖之  
隱現窮下巖上谷之玲瓏別有胡麻流飯碧桃競芳煙  
鬟綽約宛在中央施懸鈴之甲帳值采藥之仙郎懼彩  
鸞之呵譴贈玉書而徬徨方半載兮娛樂閱幾世兮滄  
桑彼袁根與柏碩亦邂逅于驅羊他如竈前菜藩石壁  
詩章游戲應真吟詠曹唐豐干之舌兮問寒山而未能  
嘿嘿于微之額兮誦左神而羣詫琅琅而且鯉磬琴高  
馬隱間丘歷九里而松如東指推大衍而水忽西流玉  
芝生乎澗畔琪樹挺乎山陬長生之草蔥芊娑羅之艷

紛稠萃鸞翔鳳鳴之靈異攬龍吟熊跑之清幽雙澗動  
濠梁之想螺溪下新月之鈎何爽心而悅目恣遐討與  
冥搜於是拉方平而擘麟脯召麻姑而擲丹砂探佛隴  
而振策過明巖而停車膏餐粒玉杯泛流霞羨穀城之  
高致思衡岳以爲家憶右軍兮臨池洗墨慕太白兮夢  
遊成吟披玉蟾之賦覩擇木之銘還鑿山而通道兮追  
謝公之蠟屐聊濡毫以寄興兮愧孫綽之金聲

張賢良

宋人

赤城山招仙賦

以下赤城

張子返遊吳之棹泛入越之船歸子晉吹笙之臺館尋

謝公著屐之山川杖策於天台之境濯足于青溪之泉  
有山蒼蒼蜿蜿迴延排幽石與秀壑儼龍蟠而虎眠於  
時初霽小雨平收暮煙鋪紅滴翠錦屏疊聯驚圖畫之  
所就掛千尋而倚天行人指之曰此赤城也洞名玉京  
仙風凜凜別有天兮瑤池閬苑中有人兮翠華偃佺有  
金漿瓊液以養其真性無蝸名蠅利以撓其天全滄胡  
麻與沆漚能不老以長年張子聞之蹙然而喜思欲飄  
飄拂衣浩歌而前扳藤蘿于絕壁拂蔥蘢于層巖扣松  
關而掀蕙帳陪仙遊而悟真詮高談世外之事一濯去  
其塵緣柰仙人之招兮勒回俗士之駕惟見峩峩雉堞

空鎖鑰于天邊野花發而生香鬪鮮紅而爭妍雲飛片  
段兮張屏幙而圍繞霞飛錦綺兮舞蘿衣之翩翩弄笙  
簫兮溪流泯泯擁鸞珮兮山鳥翩翩青猿叫兮天地俱  
冷晚晴照兮山水添鮮覺徘徊之既久忘世故之拘攣  
恍然如食王母之蟠桃燕嫦娥之嬋娟若在乎清明之  
風露兮不知名利之所牽奈何俗緣之未斷眷然有歸  
與之興欲膏吾車以言邁莫遲留而少延嘗聞司馬子  
微身居此山名在絳闕李謫仙相見于江陵謂其有仙  
風道骨可與神遊八極之表予豈塵埃人也予師黃石  
公子友赤松子異日掛冠於功成名遂之日將跨鶴相

見于白雲之巔尚未晚也幸相待焉一劍橫空未飲洗  
腸之水長鯨駕海更邀捉月之仙因歌曰晚天因雨磨  
青銅天邊一色猶青蔥秀山遠出三四峰上有千古仙  
人宮仙人在兮花露濃山高日月常春風仙人去兮雞  
犬從青猿叫落秋復冬高城百丈蒼蘚封但見古塔撐  
青空劉晨阮肇皆仙翁仙源有路應相通我來過轄情  
囿囿木能同跨青鱗龍扁舟異日來相從應見滿溪流  
水桃花紅

楊文聰

陳函輝筆

赤城賦

粵若稽夫良育咸胎化于崑崙羗蜿蜒而指越乎坤寧  
而迅奔囊括萬峰之秀挺拔衆竅之尊方從子位宿以  
牛分萑鬼逶迤巖削雉凝輕煙銷漢庭之色氣候韜炎  
帝之精當其步阿而望景也鴻包瓊瑤紆鬱崛隆雲磴  
磴以照面赫燁燁而華宮渺于漢之飛閣影乘虛而借  
穹蹲如踞虎矯若翔龍立雄骨駿體臥桃花朱赭膺門  
走血渥注將葛洪之爐炭未灰將茅盈之丹砂未死將  
魏夫人之絳帳排空將天寇氏之塞門盡紫甚有驚飛  
洞庭之艷遙橫赤壁之擬噫嘻亦何其蕩神而可喜也  
及其拾級而登麓也石鱗油油白雲簌簌騰騰熒熒衆

鳥逐逐勞足逸筍游神極目萬綠塵顏兩頤掠木松飛  
裂背之煙風度敲雲之竹叩下巖走上谷窮莽蒼剔幽  
獨眺好溪之北流濔濔浙浙仰華頂而東峙峩峩嶮嶮  
釋籤結集章荆畱魂魄而巖扃掬水洗心曇猷剖肝腸  
而泉冽妃子之塔骨長流寒山之燼龍未滅遂招青蓮  
于天姥問彩筆于墨池思戒公兮虎變望閭丘兮馬嘶  
其晨肇之歌舞抑雙鬟之凝脂歟俯仰周章流目矍矍  
電繞峰陰光函谷影踏窈窕之幽洞捫岑崟之危蘿尋  
毒蟒于飛錫採穢韭于崇阿索金簡而覓玉書拾瑤草  
而摘琪柯暮靄初凝藏琥珀于薄霧翠微遙射集珊瑚



于淺素魂惕惕而悸驚心惓惓而發怖于是寄阮情于  
酒政脫謝屐于行廚錫公爵而渥顏烹鳳皇于丹墟石  
室取精金臺備味三鳥獻靈四神攸萃傾露凝而奠牟  
揚白雪之清歌韋卿之金錢再貢子晉之笙鶴重過若  
縹渺于蜃背若笑浪于星河寒芒抽山尖之鏡微風吹  
飛瀑之波捷獵盃傳支離分赴縱橫鯨吞各有所趣爾  
其顧名思義靜叩宿因前身金粟面目自真驚數十年  
之夢寐記一兩字之精神道子抽毫虎頭布格加僧絲  
之一點添三毛于頰額識梅溪之再來奚假乎豐于饒  
舌之力若駕車馬于日 結宮觀于青芝萬春方華千

齒如基斯爲九如地捧三祝天遣也亦有子昂并辭筆  
驅萬馬聲振金庭名高鄴下其奔溢也汪洸汎溟溟  
渺沔其奇峻也崢嶸峭崿崿嶸嶸峴峴其吐肝胆而剖心  
胸也極性分之至誼解塵紛之糾紐喜休文之未湮誇  
承禎之十友值樂事之未央願勝遊之再偶亂曰乘蹻  
絕往覲蓬萊兮丹崖餐玉躡仙臺兮肅氣寧魂息恒胎  
兮月光童子偕往來兮在陰和鶴翅皚皚兮金庭曄曄  
閣嵬嵬兮玉京無垠映三台兮瓊臺矗起雙闕開兮慚  
無叔卿度世父子之仙才兮將奚以甲五嶽小十洲道  
廣莫而如嬰兒之未孩兮

董

曾

新昌人字貫道明太祖以禮招致授知無爲州遇陳友諒寇城被執不屈而死

天姥山賦

客有問于沃洲處士曰蓋聞會稽山水沃洲天姥爲之  
矚目然沃洲則脩竹平津王謝之所棲息靈泉古剎爽  
竺之所駐錫余固嘗聞其略矣若夫天姥之耳邊清猿  
杜少陵之佳句可考空中天雞李謫仙之夢遊甚奇亦  
豈有敷其實而剖其的者乎吾于此焉是處斂糴藏英  
日有所嘗擊足有所嘗經天姥之勝亦旣厭聞而飮覩  
之矣願子發丘壑之奇蘊抒煙霞之深情博我以天姥  
啓我以地靈處士曰唯唯天姥之山表乎東南實爲新

昌下壁劃乎后土上撓拂乎穹蒼左傾赤城華頂之攢  
巒右俯會稽秦望之崇岡四明僕趨于其後王山秀拱  
於其陽靈貫斗牛之墟雄鎮于越之疆剡溪若一線之  
縈紆東海僅杯水之汪洋巖巖業業攙攙搶搶根盤薄  
其幾里名烜赫乎一方吐瑞靄而吸祥煙紛兔彩而隔  
日光色沉沉其欲雨氣肅肅以成霜遠而望之若雲鵬  
之投翅近而察之如陣馬之騰驤青翠齒萃茵萑特出  
側者弁俄端者圭立或谷而杳或阜而突峭岳從雙脩  
嶺盤屈千姿百態變化歛忽夕輝映面絳氣扶疎宿雨  
霽而浮嵐勃鬱藹然春茂之蕃華瘁爾秋凋之風骨信

良工之莫繪雖辨口其奚述陟之者神悅悅于清都仰  
之者目瞪瞪于天闕茲蓋幽怪之所憑凌猛鷲之所巢  
穴也至若松濤動壑寒聲回薄竹翠連空煙光重疊巖  
棲異卉澗老青楓有柘而瑞有泉而蒙黃精委輕身之  
餌白朮任厥貢之供金芝蓮莖而煒灼瑤草濯秀以玲  
瓏琥珀幻千年之松脂琅玕吐萬丈之白虹翠壁如削  
丹崖可礮洞扉蹶躡以傍啓地道黝糾以潛通石巘岈  
其踞虎木偃蹇其遊龍瀑流飛洩以夏寒巖電閃爍以  
霄紅蒼苔想謝公之屐齒藥徑憶劉阮之仙踪安期羨  
門金母木公徘徊雲舉蒼莽鴻濛清虛羽仙之館窈窕

梵王之宮寶閣霞擁昧宇雲封風廊几殿暮鼓晨鐘  
曳朱其頰或青其瞳或龐眉而圓頂或雪鬢而冰容或  
引以辟穀或趺坐而談空丹成九轉教演六宗拍肩白  
足揖袂赤松傲圭組于物表等蓬閬于壺中是皆所以  
示不滅之相鍊冲舉之功雖虛寂之不足尚要皆有以  
闡元化而躡仙風也客曰子之所陳博矣大矣宏矣麗  
矣偉哉茲山誠仙佛之窟宅煙霞之源委子勿謂乎支  
離予請得而議擬然是山也匪宅中土匪奠輿區跡遠  
界乎蠻陬名近覩乎異書職方之紀蔑有禹貢之載缺  
如凋穆西遊之轍詎臻乎絕境秦皇東駐之蹕卒限于

脩途旣無預于五嶽之時巡烏有乎萬歲之嵩呼此所以不獲行金冊玉函之秘遂溼沒乎一隅禽鳥啁唧其若訴松桂黯慘其若愚老煙嶂之胎禽怨月嶠之於菟諒人生之取舍亦物理之同符苟茲山之可移屹萬仞于通都蓋將有以掩西華而觀南極詫元嶠而誇方壺玉帛于焉以旁午冠蓋于爾乎躊躇又何有林扃之爭誦松徑之纂蕪哉處士悚然不怡曰嗚呼噫嘻陋哉子之趣也夫聖軌沙漠皇風寂寥茂德以誇散朴以澆雖考古之簡牒而泥金檢玉之恥實賸民之脂膏彼嵩岱之受污亦崑嶠之獻嘲吾子固乃挾彼以議此誤貶而

謬褒是猶欲禍犧牛以文錦之炫爛成鷓鴣以鐘鼓之  
噉嘈倘天姥之有知也縱不能如北山之移文以杜妄  
轡亦將有以類巢由之洗耳以避唐堯矣乃歌曰清風  
皓月兮茲山之高勝人韻士兮茲山之遭一塵不點兮  
何取乎輪蹄之躡轢牲酒之腥臊歌既終於是俯仰怡  
神山青雲白客報其言遂巡避席

馮尹年

臨海人字伊仲

華頂杖賦

以下華頂杖

維台嶽之寵從夙孕奇于蒼莽迴環八百餘里峻極萬  
八千丈旣矗立乎層霄更超出于塵鞅紫霧丹霞之所



飄泊日精月華之所摩盪鍾秀氣兮靈根挺異姿兮福  
壤于是蘖芽茁柯幹開盤澗壑飽風雷和瓊林之琪樹  
抱神芝于燕胎歲月老時覘勁質支蔓剔處顯奇材瘦  
于霜鶴之脰文成黃耆之飴九節不殊少室製根鬚寧  
同大宛來爾乃挑去曉雲攜歸夜月同聆子晉之笙常  
伴曇猷之鉢應真之金策齊鳴柳家之鐵柱堪雜撫龍  
鱗而策佛隴之松隨鶴斃而履斷橋之雪緩步于飛瀑  
石梁逍遙于玉京仙闕陪青箬而叩僕射之宮追雙鬢  
而餐雲母之屑過梅橋而逡巡陟瓊臺以輕脫太白堂  
前任流憩而閒吟右軍池畔恣攜持以步履登九折以

舒蹋蹋之清歌挂百錢而聽啾啾之弄舌朝指蓬島而  
睇扶桑暮捫石蘿而攀野葛是以產自絕境厥名萬年  
結根于仙靈之窟綿亘于降魔之巔媿寸寸之瓊玉擬  
片片之香梅尊句袖鞭跡山泉之脈脈青鞵布襪荷輕  
策以軒軒支斑藤兮瀟灑扶靈壽兮蹁躚叱石羊兮羣  
起握騎龍兮上仙信乎爲天台之異種夫豈與筇籜而  
爭妍若夫艷仙都之逍遙脫塵氛之束縛渺少文之臥  
遊笑向平于五嶽方將神馬尻輪出冥入漠挹玄玉之  
靈膏觀釣天之廣樂荷葡萄兮戲五煙之遊鴻曳枕柳  
兮招三島之黃鶴豈直藉茲玉鳩扶此銀角僅躡屩乎

洞天聊放情于丘壑化龍羨葛陂之投然蒸輝天祿之閣也哉

王祖澤

華頂杖賦

繫華峰之特立冠越山而稱雄蔭三能而通帝座若五嶽之首岱宗丈積萬千而雲封其上里周八百而霞起其中爰有蒼藤蟠于幽谷葉翔鸞鳳之儀幹聚虬龍之族歷振古之雪霜異人間之草木紋縱橫以鱗鱗眼淺深而簇簇截爲杖策撥玉京之紫芝藉其扶持訪金庭之丹粟爾乃探石梁而觀飛瀑睇溟渤而賓朝曦匪欲

投於鄧林訝將化于葛陂剛不殊夫麟角柔詎埒乎蝦  
鬚肩皓月而登雙闕代籊竿以釣螺溪點鴻鴈之歸飛  
數其陣陣指娑羅之芳艷愛其離離則有采藥仙郎負  
圖荷木逢綽約之雙鬟恣流連于七日笑捉杯之何遲  
亦贈書而復出別有題詩寒拾饒舌豐干或支藤而攜  
菜瀋更飛錫而翔林端倘值開山之茅君莫中柱而斷  
如激矢擬贈九天之僕射伴采薇而深入層巒它如漢  
平有霧壽之頒魏文有延年之詔青筇契李耳之居青  
藜分太乙之耀驕龍抵夜明之神奇鶴膝共梅柯而孤  
峭桃竹見重於浣花方竹亦森于赤嶠未若壽枝之可

娛得以濟勝而遐眺宜日休之有詠繼龜蒙以成陸杖  
因之而增價峰仗爾而幽尊則予之登高寄興賦物適  
情也敢竊比於夢遊之句擲地之聲

續刊

許君徵

字雲怡天台人

### 赤城山賦

兩儀既判羣山兀峙聳翠流青一碧千里何赤城之離  
奇千九霄而色紫氣凌丹丘而嶙峋收闕閭闔而百雉  
超超乎朱霞燦爛於天庭飄飄乎層樓變幻於海市遙  
而望之若季倫之錦乍開邇而矚之如司馬之丹臺矗

起映日則珊瑚耀影於空中籠霧則琥珀韜光於帳裏  
崔巍則彩鳳翔兮千仞灼爍則火龍照兮萬紀誠宇內  
瓊瑤之奇觀非崧喬森挺之可擬於是躡謝屐扶葛筇  
步仄徑披蒙茸訪中巖謁禪宮飛泉千道而灑落脩竹  
萬竿而凌空幽洞厥兮青松暗紺殿巍兮白雲封觀曇  
猷之遺跡訝五百之神通旣屏氣而稍息復乘輿而登  
峰陟從隆之峻嶺躡盤曲之危踪衣拂拂而侵霧履步  
步而馭風聽悲猿之嗷嗷聆神鹿之嚙嚙喜洞天之在  
望奮羽翮而相從恍躋身於霞表儼帝座之可通若其  
洞名玉京池號金錢飛仙於此而穿劍高僧於此而釋

籛至夫萑生洗腸之井蘿遶伏蟒之區妃子之浮屠長  
在葛洪之丹爐常噓此皆名山之異跡勝地之靈奇也  
若夫尋金簡覓玉書飲沆瀣採瓊芝招吹笙之子晉揖  
脩真之子微友飡霞之太乙駕追仙之駿駢可以神遊  
八極之表氣凌三山之嶠何必升崑崙登蓬壺然後形  
偕天地而不朽壽並日月而齊驅哉乃知非煙霞之逸  
品不能濡綵筆於墨池非凌雲之仙才不能騎白鹿乎  
天姥故誦擲地之金聲千載猶傳建標之奇語若夫禪  
祀而展登封是有俟乎懷柔之聖主

夢遊天台賦

繫乾涖之鴻運歷六寓而非遙緬海上之方蓬畢昏嫁  
以遊遨知不可乎必得託意想於神囂於是游思旣富  
心馳神運身與境會結而爲夢化莊生之蝴蝶控雲間  
之蜚鳳爾迺相羊極表清典襄徊會巒疊嶂曰維莫台  
山無峰而不秀景無地而不佳乃僊靈所窟宅脫世網  
於紛埃爰有雉堞凌雲闕闕霞起寺排中巖湛然遺址  
西有玉京北有金錢浮屠七級峩峩高懸慧明臥佛之  
崖雲猷洗腸之泉叢杉蒼翠而杳靄修竹蒼翳以便娟  
拂雲洞側樓敞清飄穿劔巖口綫劃中黃滴水涼心而



沁脾晴嵐變幻以盤旋若乃峭壁千尋巖萬丈瓊臺  
雙闕屹然相向遠吞吳越斗接箕上日月出没煙雲跌  
宕龍湫俯眎而難近馬鞍仰攀而可傍仙人羽化之形  
蘿蔓交結之狀或目眩而覓解或心怡而神王若夫石  
梁斷橋袤延百里濺沫蜚瀝其奔如駛萬騎雲屯千乘  
雷起殷殷駸駸喧聒未已莫不令人骨醉魄驚戰心擊  
齒亦蛟龍所出入非人間之可比至若金庭桐柏透瓶  
青溪迤邐道觀揜映招提紫凝千丈之瀑丹丘灌葉之  
畦響巖聲震乎空谷水索影掣於峯西寒石潛真竇散  
靈虬之髯嶺船迴絕岩蹲望月之扉五老峯高而毛竹

挺秀天姥雲尖而簫鼓聲低乎濟廟中誰識神龍之蹟  
忠宣祠裏永懷鸞鳳之棲盤石注經而靈虛紀勝國清  
顯異而應運甯題爾迺足登華頂袖拂朝陽瞰溟海瞻  
括蒼觀雁宕眺錢塘羣峯羅列而環繞宮觀鱗次以相  
望橋有會仙之亭臺隣降真之堂聳鷄犬於雲中鳴鐘  
梵於苴上鶴鶴花放而采映赤城金松秀發而幹凌秋  
霜佛頭產於靈谷六芝茁於黃壤拾月中之桂子採石  
上之菖陽隴猿抱木而騰躑金雀挾伴以翱翔使君去  
兮鈴帳空石像存兮清風美川尋丹井而寂寞搨墨池  
以惆悵於時遊歷已徧氣和神饒六鑿遠除塵思頓消

短咏長吟於焉逍遙爾迺金鷄歛迹玉兔東升鶴聲嘹  
歷松影鬚髻晤子晉於瀟房邀拾得於岡陵呈五宗之  
奧旨授寶訣於三庭飲以瓊玉之液錫以龜鶴之齡回  
已謝之芳顏變垂白之星星倏鳴鷄之膈膊乃載寢而  
言興失雲踪之萬里覓仿悲兮曾經願策驥以行遠終  
皎潔而淑清

天台山全志卷十五

楚郢張聯元覺菴輯

天台山詩

李巨仁

遊天台山

台山稱地鎮千仞上凌霄雲開金闕迥霧暗石梁遙翠  
微橫鳥道珠澗入星橋風急青溪晚霞起赤城朝寓目  
幽棲地駕言逸綺季避世桃源士忘情漆園吏抽簪傲  
九辟脫屣輕千駟沈冥負俗心蕭灑凌雲意蒼蒼聳極  
天伏眺盡山川疊峰如積浪分崖若斷煙淺深聞過渡

輕重聽飛泉採藥逢三鳥尋真值九仙藏書凡幾代看  
博已經年逝將追羽客千載一來旋

孟浩然

襄陽人張九齡辟爲荊州從事

越中逢天台太乙子

仙穴逢羽人停臚向前拜問余涉風水何處遠行邁登  
陸尋天台順流下吳會茲山夙所尚安得問靈怪上逼  
青天高俯臨滄海大雞鳴見日出常覲仙人旆往來赤  
城中逍遙白雲外莓苔異人間瀑布當空界福庭長自  
然華頂舊稱最永此從之遊何當濟所屆

尋天台山

吾愛太乙子，孝官跡亦如。會與華刀法，不惜惡名母。  
馬憑雲宿揚帆，截海行高高。翠微裏遙見石梁橫。

舟中曉望台山

掛石東南望，青山水國遙。舳艫爭利涉，來往任風潮。問  
我今何適，天台訪石橋。坐看霞色曉，疑是赤城標。

司馬承禎

山居洗心

不踐名利道，始覺塵上腥。不味稻粱食，始覺神骨清。羅  
浮奔走外，日月無晦明。山瘦松亦勁，鶴老飛更輕。逍遙  
此中客，翠髮皆長青。草木多古色，雞犬無新聲。君有出

俗志不貪英雄名傲然脫冠帶改換人間情去矣丹霄  
路向曉雲冥冥

張說

字道濟洛陽人策賢良方正第一封燕國公

寄天台司馬道士

世上求真客天台去不還傳聞有仙藥夢寐在茲山朱  
闕青霞斷瑤臺紫月閒何時枉飛鶴笙吹接人間

宋之問

字延清弘農人官弘文館學士轉越州長史  
後流欽州賜死有集十卷

送司馬道士還天台

羽客笙歌此地違離筵數處白雲飛蓬萊闕下長相憶  
桐柏山頭去不歸

李嶠嶠字巨山十五道五經學通玉牒前

送司馬承禎歸天台

蓬閣桃源兩處分  
人間海上不相聞  
一朝琴裏悲黃鶴

何日山頭望白雲

張九齡字子壽曲江人官至中書侍郎每拜相帝輒問曰風度得如九齡否謚文獻

送楊道士往天台

鬼谷還成道天台去學仙  
行應松子化畱與世人傳  
此地煙波遠何時羽駕旋  
當須一把袂城郭共依然

李

白字太白賀知章見其文嘆曰子謫仙人也元宗召見奏頌一篇帝賜食親爲調羹詔供奉

翰林



天台曉望

天台鄰四明華頂高百越門標赤城霞樓棲蒼島月凭  
危一登覽直下見溟渤雲垂大鵬翻波動巨鰲沒風濤  
常洶湧神怪何喻忽觀奇跡天倪好道心不歇攀條摘  
珠寶服藥煉真骨安得生羽翰千秋臥蓬闕

同友人舟行

楚臣傷江楓謝客拾海月懷沙去瀟湘掛席泛溟渤寒  
予訪前跡獨往造窮髮古人不可攀去若浮雲沒願言  
弄倒景從此煉真骨華頂窺絕冥蓬壺望超忽不知青  
春度但怪綠芳歇空持釣鰲心從此謝魏闕

送楊山人歸天台

客有思天台東行路超忽濤落浙江秋沙明浦陽月今  
遊方厭楚昨夢先歸越且盡秉燭懽無辭凌晨發

送從姪之台州

我家小阮賢剖竹赤城邊詩人多見重官燭未曾然興  
引登山屐情催泛海船石橋如可度攜手弄雲煙

崔湜

定州人字澄源舉進士官至中書侍郎平章  
事有詩一卷

寄天台司馬先生

聞有三元客祈仙九轉成人間白雲返天上赤龍迎尚  
惜金芝曉仍攀琪樹榮何年緱嶺上一謝洛陽城

劉禹錫

彭城人字夢得貞元進士

憶天台山

常記遊靈境道人情不低巖房容偃息天路許相攜霞  
散曙峰外虹生涼瀑西何當謝塵役重去聽猿啼

常建

人字

龍窟泛舟寄天台學道者

夕翠映山深餘輝在龍窟扁舟滄浪意澹澹花影沒西  
浮入天色南望對雲闕因憶莓苔峰初陽濯元髮泉蘿  
兩幽映松鶴聞清越碧海瑩子神玉膏澤人骨忽然爲  
枯木微興遂如兀應寂中有天明心外無物環迴從所

遊天台山記

張

佑

南陽人字承吉太和時卒有集一卷

遊天台

崔嵬海西鎮靈跡傳千古羣峰日來朝  
纍纍孫侍禮三  
茅卽拳石二室猶塊土傍洞窟神仙中巖宅龍虎窟從  
乾取象位與坤作輔鸞鶴自相羣前人空若鷲巖巖到  
秋碧媧女徒巧補視聽出塵埃處高心漸苦纔登招手  
石肘底笑天姥仰看華蓋尖赤日雲上午奔雷撼深谷  
下見山腳雨回首望四明巖巖若城堵昏晨邈千態恐  
動非自主控鶴大夢中坐覺身詡詡東溟子時月却孕

元化母彭蠡不盈杯浙江微辨縷石梁竝橫架萬仞干  
壁豎却瞰赤城巔勢來如刀砮盤松國清道九里天莫  
覩穹崇上嶺三峽吼旁聳五空岬絕凡路癡立廩與塵  
邈峻極天門觀海窮地戶金庭路非遠徒步欲將舉身  
樂道家流敦儒者一矩行尊白雲叟禮象登峻宇佛窟  
了杉栴仙壇半榛莽懸崖與飛瀑險噴難足俯海眼通  
三井羽門雙闕柱瓊臺下昏側手足前采乳但造不死  
鄉前勞何足數

柳

泌

元和中台州刺史

玉清行

遙遙寒冬時蕭蕭躡太無仰望藥珠殿橫天臨玉虛下  
看白日流上造真皇居西牖日門開南衛星宿竦王母  
來瑤池慶雲擁瓊車崑崙丹鳳冠長曳紫霞裾瑩徹聖  
姿嚴飄颻神步徐仙郎執玉節侍女捧金書靈香散彩  
煙北闕路駟闐龍馬行無跡歌鐘聲沸天馭風升寶座  
停景宴華筵妙奏三清曲高羅萬古仙七珍飛滿座九  
液酌如泉靈佩垂軒下旗旛列帳前獅麟威赫赫鸞鳳  
影翩翩顧盼乃須臾已是數千年

賈

島范陽人字開仙始爲浮屠後舉進士有文集及詩格一卷

送僧歸天台

辭秦歸越國歸寺海西峰石澗雙流下山門九里松曾  
聞清禁漏却憶赤城鐘妙字研磨講應齊智者踪

許

渾

丹陽人字用晦太和間進士累官刺史著有  
丁卯集

早發天台

來往天台天姥間欲求真訣駐衰顏星河半落巖前寺  
雲霧初開嶺上關丹壑樹多風浩浩碧溪苔淺水潺潺  
可知劉阮無人處行盡深山又是山

思天台山

赤城雲雪深山客負歸心昨夜西齋宿月明琪樹林

徐疑

人字

天台獨夜

銀地秋月色石梁夜溪聲誰知屐齒盡爲破蒼苔行

李

郢

一卷

人字楚望大中間進士官侍御史有集

重遊天台

南國天台山水奇石橋危嶮古來知龍潭直上一百丈

誰見生公獨坐時

方干

新定人字雄飛與樂安孫郢友善

路入天台氣象清垂鞭樹石罅中行霧昏不見西陵岸  
風急先聞瀑布聲

羅

隱

錢塘人字昭諫錢鏐辟爲從事節度判官



送程尊師遊天台

華蓋峰前隴上耕，主人無奈又閒行。  
且憑鶴駕尋滄海，又恐犀軒過赤城。  
絳簡便應朝右弼，紫旄兼合見東卿。  
勸君莫忘歸時節，芝似螢光處處生。

高似孫

會稽人字穎古

天台渡

一江夾清渾，回首青村注。餘雲拖薄潤，遠靄霏輕素。  
船輕順流下，石狹奔湍怒。蒼陰布仙跡，野芳生幽趣。  
山色各有舊，春晴宛如訴。徘徊良自得，泱泱又將暮。  
遐瞻金碧庭，可入丹丘路。今夜宿桃花，切莫囟囟去。

夏

竦

字子喬大中祥符中任台州通判後相仁宗  
謚文莊

天台道中

驅馬天台路悠悠漸向晨雲間忽見寺山盡偶逢人細  
雨疎篔簹長微煙古木春行行逢驛道落吹起輕塵

汪

藻

字彥章新安人官翰林院顯謨閣學士建炎  
中避地居台著有浮溪集

天台道中

渺渺孤城逐鴈飛茫茫平野見人稀水紋縈石作蟲篆  
麥隴挂峰如衲衣日月尚留滄海照山川應護翠華歸  
春風自滿江南岸不管人間萬事非

曾

畿

字吉父其先穎人徙河南知台州政尚簡靜  
有簾影垂晝寂竹陰生夏寒之句歷官禮部

侍郎

初至天台

疇昔所欣慕天台冠坤靈興公妙摹寫燦若披圖經白  
憐櫻世網仰愧徒冥冥夙契諒非淺半生吏金庭成此  
一段奇得按東吳行又分臨海竹想像山圍屏稍稍向  
鈴閣行行叩禪扃一丘與一壑所見皆所聆石梁臥劔  
戟布水驅雷霆五百大開士神光闕林壑於我定不薄  
是事初無形寒巖三隱者俗眼誰能青庶幾閭丘守胸  
次明涓涇向來耳聞耳鬪訟終朝聽淨洗俗塵狀數上

參雲亭

劉宰

天台道中

花重朝霏散鳥啼春意深風光自流轉行役負登臨澗  
水流晴綠山雲掩夕曛病容兼白髮漂泊此時心

王十朋

樂清人字龜齡號梅溪紹興二十七年廷對  
忠鯁高宗擢爲第一官至龍圖閣學士謚文

忠著有  
梅溪集

望天台山

神仙境界無戰爭奚用漆此嵬嵬城吾聞秦王昔多慾  
富貴已極貪長生蓬萊方丈欲親到車轍馬跡無時停  
萬騎南巡適吳越天台咫尺行將登仙山不容俗眼見

天爲設險藏神靈山中採藥使未返鮑魚已向沙丘腥  
秦爲防胡築紫塞連年不恤生靈害天亦防秦甚防胡  
赤城南峙煙霞外神仙要非求可得祖龍可笑徒勞力  
當時劉阮本無心花笑水迎山自闢我向丹丘數往來  
羣仙杖鋤未容陪揮毫欲續興公賦愧非擲地金聲才  
極目蒼蒼千萬丈世無仙骨那能上須待內外兩丹成  
駕鶴驂鸞如指掌

過天台

目逆仙山路丹城未暇躋雪深封佛隴雲暗鎖幽溪流  
水無還有亂山高復低欲尋劉阮洞歸路恐成迷

陳知柔

遊天台山

煙蘿穿幾重紫車倦驅駕忽聞鐘磬音山腰得僧舍  
僧聞我來曳杖出相迓揖我入虛堂重臨欠臺榭老屋  
數椽餘風物自閒暇古木出雲杪遙琴來竹罇下臨一  
泓水涵光冷相射但能了此生未遽慚大厦我本山中  
人偶失學圃稼爲來聊復畱同僧且過夏得舟家可浮  
遇竹宅便借是處皆南山何必東籬下悠悠去忘歸寧  
懼長官罵松月可畱客徘徊度清夜

謝深甫

臨海人字子肅乾道間進士知  
樞密院事拜右丞相封申國公

天台道中

溪繞青山路繞溪，山長溪曲路高低。  
晴灘淺濕舟如盪，危磴稜層石作梯。  
晚照荒村飛鳥入，秋風落葉敗蟬嘶。  
碧雲四合長天暮，轉使鄉關望眼迷。

洪适

天台道中

灘聲因雨急，山勢向雲斜。  
橘綠誰能畫，楓丹近似花。  
春鋤懷淺水，郭索上寒沙。  
漸聽鳴梭近，林中三兩家。

蕭一中

遊天台

我聞天台勝乃在廿載前寤寐思弗得懷念心悄然今  
茲獲登眺真若凌雲煙開襟袖六合流睇俯八埏諸峰  
迥羅立層崖峭森巖瑤花發榮滋琪樹交爭妍行行望  
石梁岐路阻且長石梁不可度捫蘿躡其傍仰觀瀑布  
泉恍若銀河涓情境意俱適翛然恣遠竊顧予渺然躬  
卒歲風塵中東城復南陌飄飄揚飛蓬無能作翔鳳徒  
爾羨冥鴻

王 畿

再遊天台

雨裏雲霞濕不飛碧桃零落洞門稀劉郎已去無消息



應有王喬採藥歸

其二

曾跨飛虹瞰石湫  
重來孤興未全消  
寥天落木千峰淨  
塵世無勞夢鐵橋

趙湘

天台思古

遊人行盡天台路  
仙家杳杳知何處  
惟有山前一派谿  
落花依舊畱春暮

姚寬

天台夜雨

瘴海遠粘天山城入暝煙春潮生蛤蜊夜雨長蝸涎燈  
几花時落風簾客未眠平生懷此地今夕意茫然

陳孚

字剛中至大元年以翰林侍制改台州同知

天台懷古

台嶽名高海上山尊幽不憚遠躋攀上方鐘鼓煙霞裏  
仙境樓臺霄漢間巖竇有泉流玉液石橋無路覓金丹  
劉郎已去經千載洞口無人再啓關

范德機

憶遊天台寄道士

憶昨天台到赤城幾朝仙籟耳邊生雲龍出水風聲急

海鶴鳴臯日色清石筍半山移步險桂花當澗拂衣輕  
今來盡是人間夢劉阮茫茫何處尋

樓

鏞

四明人淳熙七年任台州通判有善政官至  
參知政事

天台道中口占

路上人家短竹籬  
繖繖刈麥自熙熙  
可憐日對千尋瀑  
不解閒吟半字詩

謝

鐸

黃巖人字鳴治天順八年進士官至禮部侍  
郎

天台山

天台山高不極  
山中去天不咫尺  
台星下射扶桑赤  
羽旗颯爽招不得  
至今傳者神仙宅  
君不見周當盛時出

甫中峻極者嶽能降神天台山高不極竹鎮東南北天  
脊屹立乾坤自開闢

丘 嵩

天台山

高山拔起青天外玉削芙蓉隱蒼翠飛泉迸出雙匯漲  
萬斛明珠向空墜我來正值炎暑殘脩脩兩袂天風寒  
笑歌嚮振林木表劍氣高壓煙雲端平生足跡遍天下  
覽秀探奇靡遑暇荆楊吳蜀及梁秦到處江山美如畫  
天台山水允瓊奇夙昔嘗聞今見之瓊臺雙闕擁桐柏  
天封華頂如峩峩石梁橫空不盈咫萬丈深潭清見底

游入欲度先踰潭底蛟龍恐驚起應真五百何年來  
但見雲氣凝樓臺翩然拂袖下山去琪花瑤草滿歸路  
山中幽人不可招手弄玉簫倚瓊樹歸來頓覺襟懷寬  
俯視塵土何漫漫重遊定擬是何日漫題詩句畱巖巒

黃孔昭

黃巖人字世顯天順庚辰進士官至工部侍郎

### 憩天台山寺

獨憇招提境行穿松柏林鐘聲出樹遠塔影到池深掃  
葉分僧石聽猿坐竹陰回頭無限意索莫向誰吟

范吉

天台人字以真成化乙未進士官刑部主事著有柏軒集

### 題畫天台景

萬丈華峰倚碧空  
松篁臺殿白雲封  
石梁咫尺桃源洞  
遊遍名山興未窮

潘

禎

天台人字應昌寧國教諭潘偉子成化年進士山東提學著有畱鶴亭詩集

秋日夢登天台山絕頂

華峰四萬八千丈  
鶴背秋風夢一登  
坐使羣山臥平地  
笑看杯水瀉東溟  
此心本是同寥廓  
大塊真能載我形  
擬過赤城尋隱處  
倚霞結構老吾生

虞

謙

金壇人字伯益理卿有玉雪齋集

由太學生擢用歷任

用陳剛中天台懷古韻

赤城自古號名山  
萬丈華峰尚可攀  
雲逆雨來歸洞口

天台山全志 卷十五 古蹟  
水流花出到人間天風聲和瓊臺鶴夜月光生石鼎丹  
我欲乘雲朝帝闕便應從此步天關

王廷表

雲南人正德間台州府推官

遊天台山

尋常愛看山勝奇常不足今日萬山中不覺駭心目清  
興良在茲何以步芳躅把酒酌山靈抱琴共來宿

李玉芳

遊天台山

管領春風到處遊丹丘紫府碧山頭天台一萬八千丈  
丈須爲一日畱

鄭善夫

閩縣人字繼之弘治乙丑進士累官吏部郎中有少谷山人集

天台雜詩

一夜雨聲吹不斷國清寺前溪水鳴欲過天台拾瑤草  
秋風無限石梁情

其二

赤城雲閉玉真府桐柏宮涵滄海珠早晚移家葛洪井  
瓊臺雙闕是仙都

其三

曇華亭前雷雨飛石梁天巧眼中稀素裙綦屐沾雲濕  
我自天台華頂歸



其四

華頂數峰飛刺天長風白日灑雲煙鹿裘行探金明草  
笑拍洪崖星漢邊

陳恬

遊天台山

嵩陽不得到華頂可徘徊當知我性分自有一天台

范理

遊天台山

萬仞懸崖一徑斜丹梯躡盡到仙家金庭縹緲迷青嶂  
瓊闕岩崑散紫霞野鶴階前窺玉粒山童洞裏熟胡麻

桃源此去無多路流水中間認落花

王廷幹

直隸涇縣進士嘉靖二十年任台州同知

遊天台山

勝境標州北名山紀浙東天高疑可卽地險諒難窮  
宇宙誰開闢林原此鬱蔥龍潭新跡在仙掌舊臺空  
香草榮千狀奇花積萬叢深巖巢翡翠流水灌梧桐  
鳳宇瓊階綠雲橋寶樹紅玲瓏珠閣麗峻絕石梁雄  
滄海還觀日赤城似貫虹朱明未暇候白露已含風  
尋賞國清寺問元桐柏宮天涯聞夜鶴海日悵秋鴻  
靈異荷神護登臨感化工理人懷謝守載筆愧孫公  
永夏情方盛夕陽

興未終芳辰忘辱累佳氣逸蛟峒何日丹丘住脩真步

葛洪

屠本峻

鄞縣人字田叔尚書大山子承蔭官至運使有屠田叔詩草

送無盡師還天台

吾師無住相金策又從東歸去天台路祥雲賞不窮談  
經花雨積度世法輪空莫笑辭官晚猶能送遠公

梁雲構

再訪天台

已認天台是故人今番重訪更相親石橋流水仍同雪  
仙洞桃花又一春樹樹流鶯接梵響山山衲子避車塵

便須畱此朋猿鶴自憎勞勞日問津

孔天蔭

汾州人字汝錫嘉靖間進士官浙江右布政使有文谷集

天台路畱眺

孰謂天路遙而吾踐斯境  
樵溪始直進丹橋  
寢凌騁璇玉表殊流  
雲霞絢層嶺登頓躡仙蹤  
洞公鑑塵影複徑來轉幽  
連巖去彌永石翠挾桐精  
潭華鏤金影鶴笙時彷彿  
琪樹乍森冷飯麻人莫從  
茹芝懷徒耿福庭倘果畱  
羽化在俄頃

項復弘

號任寰臨海人萬曆庚辰進士官吏部員外郎

劉阮遊天台

洞口桃花轉眼新  
搗來東海幾灰塵  
欲求籙署長生字  
須倩丹扶不老身  
爾我踏開華頂月  
乾坤買斷石橋春  
謾言解語惟花在  
髣髴空山別有人

徐

渭

字文長山陰人

言游武夷道中憶往年尚賓呂公天台之約

巖壑千重路轉偏  
春陰漠漠帶炊煙  
困投野店聊呼酒  
笑問名山數舉鞭  
籠鳥對人喧曙色  
桃花流水弄新年  
多情忽憶天台約  
歸去應尋剡曲船

王穉登

字百穀長洲人國子監生有晉陵金昌燕市客越青雀竹箭梅花什荆溪松壇諸集

送無盡禪師還天台

白雲流水伴閒身，挂衲棲遲鳥雀馴。  
古佛浮來知異代，空門到處悟前身。  
因坐回芳草，過殘臘。聽盡鳴禽已暮春。  
行度石梁人境隔，青鞋細踏落花塵。

顏

邁

慈谿人，字公于，號拙崖。崇禎間，蔭任。著有  
皆舫集。

病歸天台道中遠望一瀑有千仞之勢，詢之茶亭  
老僧云：是桐柏山瀑也。漫成二首。

夙昔愛登臨，捫蘿援絕磴。行行入天台，峰竒神志勁。  
擬探玉京餘，歷歷窮所勝。定有羽客逢，豈吝白雲贈。  
一病竟束縛，遊山亦蹭蹬。逝矣康樂屐，索然子猷興。  
歸與屢回首，感嘆終未竟。

塵途望遠岫危道懸天平神山接蓬萊靈境炫霄漢僧  
云是桐柏下洩爲素練其上有仙都黃雲於此見其中  
有臺丹砂於此鍊我欲往從之膝病登途顛高風懷  
子微此情猶戀戀

胡纘宗

鞏昌人字孝思一字世甫  
山東巡撫有烏鼠山人集

間進士官至

天台懷古

懸崖挂石梁縹緲隔仙子不見採藥人桃花自流水

黃約

人字

過天台

杖策天台路松杉萬壑陰仙人不可見花落正春深

暮春天台道中

曉行山上少人家松竹陰森石路斜遙望一溪流繞郭  
酒旗搖颺出桃花

其二

五日春晴十日陰忽看飛絮滿衣襟行人正爾傷春色  
何事落花風雨深

馮

甦

臨海人字再來順治己亥進士官至刑部侍郎

天台紀遊

并序

天台山吾籬壁間物三十年徒作夢遊今春北  
征假道出山中雖身歷屣顏然行役有程譬如



從人假數十卷異書刻日了之僅容過目無復  
流連矣入舟多暇追理游踪悔其草草聊就心  
目所及各繫以詩欲使怪石奇峰叢林瀑布長  
留吾几席且得以訂後期嗚呼吾勞人也東西  
南朔何日却尋遂初賦乎詩成更爲悵然

曾聞曠達人萬里尋名山天台洵咫尺胡爲睽攀躋所  
嗟俗慮并頓令勝緣慳今茲赤城道攔葛聊乘閒解渴  
漱石髓披襟坐禪關殿隱巖蔽虧僧孤雲往還塵懷暫  
以滌值此春風間景暄草明媚雪消溪潺湲莫以前期  
紆輒畏登陟艱行行未覺遠馳騁怡心顏

其二

嶺聳望逾曠巒迴山更空古殿倚木末傳是金庭宮構

造始何代壁破莓苔蒙肅瞻墨胎像緬懷首陽風脫屣

千乘貴繫籍桐柏崇

道書伯夷叔齊爲九天僕射治桐柏宮

代隔理詎誣

冥感如或通咄哉兩俄士乃爲帝三公局促傷浮生俛

仰慚昔踪

其三

瓊臺復何所烏道橫青天披雲撥積雪蘿蔓紛濡沾野

老念我疲取道勞鋤鋌徑盡孤峰植崖豁雙闕連忽驚

萬壑奔已在千仞僮僕更賈勇攀石窺重淵決肯眩

奇迥仰視胡能前輿隸爲俯躄梯級踏尻肩努力僅一  
上四顧心茫然乃知徑路絕更有洞壑妍非荷導引情  
孰免中道愆歸來指前溪密林叩新椽呼兒束茅茨爲  
客烹山泉向來履險危默坐得所恬幽棲倘獲諧長日  
當大年奚煩鍊丹液辛苦求神仙

其四

朝從琳館游暮歸梵宮宿故人遙相念尊酒候林麓各  
言別離易後會難可卜風塵走四方茫茫焉託足談笑  
意忘疲閒寂神逾肅坐聆禪誦清臥索溪泉沐晨興禮  
空王再拜述私祝嗟予攬初度

是日適  
于初度

久矣悵形役言

戀河陽與猶狗窮海祿他年尋遺踪俯仰愧馳逐

其五

昔者無盡師著書幽溪堂鬼神競呵護猛獸爲潛藏於  
時陶謝流來往廬山旁緬茲塵外踪頗增林岫光石洞  
恣奇幻寶坊炫輝煌天工與人巧結構何其良我來百  
年後跡在人已亡空軒闕遺像苔壁黏殘章豈無金縷  
衣法乳演道場無著天親偕當時同翱翔石可寒月二  
師俗姓兄弟  
徒感石火悲莫聆潮音揚長嘯巖壁下嚮答增慨傷

其六

一望何蒼蒼山空四無人口暖殘雪映露泫草色新忽

驚寒籬側犬嗥聲  
唵唵顧見採薇者  
荷鋤呼其鄰殷勤  
前問之石梁道何因  
去去度前嶺高峰  
錯嶙峋悲風嚮  
林杪夕陽漸西淪  
言尋靈怪踪敢辭  
途路辛

其七

徒侶忽驚語石梁  
今在茲俯視片石橫  
斷澗懸流漸捷  
往就其側日眩驚  
欹危截業千尺崖  
下峽深莫窺飛瀑  
日夕响濺沫寒人  
肌烏鵲空中度虹  
霓天外垂信哉混  
沌鑿陋彼蠶叢遺  
傳聞古應真時時  
現鬚眉我來無所  
覩瞻眺良自悲

其八

勝地與梵刹所在每間錯七十二蘭若今茲半寂寞方  
廣曇花亭萬年應真閣莊嚴始何代雕製允奇卓雲間  
踴狻猊火邊飛神鵲河沙萬億佛圍繞不可度或從海  
上來鼉蛟駕騰躍崢嶸諸天神貌狀洵醜惡乍見磔毛  
髮再拜蕩精魄靈怪之所憑奈何漸頽落大厦傾莫支  
神工踵難作兼此滄海濱嘯聚競剽掠遊履日蕭條資  
糧益衰薄數頃負石田力耕無半獲征徭况日煩緇素  
遠奔却喜茲東林公錫飛近鷺鶴時無礙師住萬年寺紺宇藉振  
脩蕪田漸恢擲所欣萬年復彌惜羣山託我貧愧布金  
矢願力已索踟躕吟此章聊以勸麤爵

其九

山行蕩塵襟疑在浮雲表  
逶迤前逕回忽復接大道  
昔時車馬音無端更繚繞  
回視萬丈峰嵯峩隔林杪  
桃源津竟逃寒巖跡亦杳  
期促愧幽尋力疲謝登眺  
撫景來方親怡情昨非渺  
徘徊既往轍倉卒惜未了  
有得乃嬰懷未至仍縈抱  
東山志勿謾言旋事幽討

仇兆鰲

郵縣人字滄柱康熙乙丑進士官至吏部侍郎著有尚友堂集

題顏暹玉天台山賦

仙餌何須求海外  
天台原不讓丹丘  
賦成直壓輿公上  
方許名山誇勝遊

其一

曾挈奚囊訪赤城  
經幢仙竈鎖瑤瓊  
只今回首經遊處  
猶覺煙嵐眼底橫

其二

飛瀑危懸千仞強  
半天高臥彩虹長  
仙都不遠人間世  
恍與飄飄度石梁

其四

展卷清吟興未慵  
夢魂猶自覺扶筇  
金松瑤草峰峰碧  
知在天台第幾重

吳權

吳江人字起士著有

吳權集



天台山行

蕭瑟千巖迥微茫一徑明雲移山換色風勁葉聞聲澗道鳴丹壑楓林動赤城仙踪如可接髮鬢見霓旌

牟欽元

字東山江蘇布政

寄懷顏通玉客天台

塵網未能脫遊仙只自猜名難登紫府君喜到天台霞向赤城起雲從華頂開好追孫綽賦還訪子微來

汪

澐

中

休寧人字千波康熙

副榜歷官刑部郎

天台紀遊

天台擅神秀聞一名桐柏玄宰藏冥奧仙真潛窟宅曩

讀興公賦清夢馳靈越昨歲楫溪行層巒現丹碧  
盤輿攬不窮寥朗驚心魄勞役苦迅征翠微未深  
索後躋鴈宕巔迴望悵莫釋同人茲再至發願踐  
奇跡守見苟不之夏蟲啣過客

其二

傍郭宿僧寺呼僧訪山途朋儔罔不行逸興羣歡  
娛霞標近五里橫互縣西隅出門溪路迷幾失此  
名區越陌度崇岡丹丘映碧虛千尋城堞雄隱約  
霧中舒蒼松夾路稠赤障峙且孤爛漫砂爲骨崢  
嶸絳作膚山文似石甃蹙裂碎珊瑚峻巖尊佛像  
翠竹護精廬詩篇傳最久

勝闢義熙初

其三

國清亦古刹碑列李邕記皮陸互題詩瀑流愛未置  
迴羅五峰龍象鬱盤勢琳宮瞻宏敞竇塔映壯麗南宋  
景德間內殿多珍賜當階羣秀攢列嶂萬松翠巖泉入  
雙溪結構據幽邃寒山拾得流飛錫依初地飯猿舊有  
臺菩提樹生意小憩對香林心空融妙義

其四

出寺迤東行峻嶺躋百折崎嶇曲磴危登頓屢一歇古  
藤道旁垂寒澗山腰洩壁斷遮其衝崖欹亂響咽垠堦

紛破碎片片各崩裂鱗皮鬱蒼柯磊砢根蟠結攀陟十  
里餘界高近天關偃蓋長童童挺不畏霜雪直赴上方  
途旁俯招提傑疲思飯青精下繞投禪悅

其五

層巖蔽曲塢四面環松篁朔風飄不至和靄延晴光翠  
綠競紛披冬無一葉黃高明闢古寺勝跡翻經堂清暉  
愛雅構定室生妙香雲根三四片大各十丈強天然屢  
甯洞翠巘還相當幽居自太古豈識世滄桑松間採露  
葵飽罷閑徜徉觀濤尊怪石重步上山岡

其六

鴈宕奇以峰天台奇以石行經十數里山體無完質縷  
脈不相融玲瓏盡分拆在山不覺山惟見石離立洪纖  
萬狀怪造化莫能測豈自秦鞭來抑待初平叱翠長霞  
氣侵苔帶松陰溼岡勢漸以低澗流穿嶺側潺潺響初  
細愈下愈崩激砉衝衆壑歸仄險瀉石級勝景怡心神  
仙源何幸入日落射瑤林遠聞飛瀑急足下白雲迷曇  
花亭影出

其七

山深兩泉會陡下勢飛奔礪浪滾洪濤層折爭吐吞洶  
涌不可當瞿唐赴荆門跨流石作梁奇絕誰能言青龍

隔岸橫孤挺無攀援其身厚尺許其脊齒微痕左齧銅  
殿古右瞻佛閣尊危橋凌險立潭波萬丈翻方廣上下  
寺鐘梵靜祇園林梵蘊靈秀信入武陵源巖空萬籟寂  
騰瀑永朝昏釋屣臥山樓願脫塵濁煩

其八

晨趨萬年寺言尋優鉢雲竹木映參髻寒雲擁精藍廣  
庭貝座肅祕閣藏經函八峰拱門戶雙澗出巉巖晉時  
留老樹雲際幾松杉謾謾濤聲起萬馬馳風颿殿後方  
丈開高空皓月涵僧徒時聽法塵柄啓迷憇愛客陳山  
肴禪棲留夜談余亦素心跡白業何妨參秉燭索題詩

依依別緒含平明示歸路竹下太平菴桃源華頂僻孤  
筇惜未探

汪

澂

休寧人號怡亭康熙甲戌進士翰林院侍讀  
學士累官

天台紀遊

兩年臨郡館清夢落天台驛路經山縣仙源匿嶺隈尋  
僧遊徑問挈客越溪來聞說霞標近行行曉霧開

其二

丹嶂依雲立排空赤似城鼎然勾漏境堞鞏漢家營峭  
壁銜虹落靈光映日明巖虛留古洞石屋竹陰清

其三

九里松崖秀雙溪石路幽寺高峰勢抱地勝佛蹤留遂  
谷窺龍伏樵林有鹿遊國清紀皮陸緬邈信仙丘

其四

峻嶺層霄上攀緣歷萬重蕩胸生白靄到眼總青松瀑  
瀉前崖樹風迴遠寺鐘峻嶒下危磴僧飯正高春

其五

岑低雲壑迴蘭若此中藏寺側穿巖洞樓邊出竹房當  
門寒桂老礙日蔓蘿長靜憩重躡險奇蹤問石梁

其六

高低怪石出隨意抱松根靈駭千巖裂形疑百獸蹲卷



阿蔽日冷峭巖逐雲奔造化鍾奇異煙光自吐吞

其七

斜日歸幽塢雲微斷復連紆林十里翠深谷百重泉石  
墜溪頻折灣低樹欲延情移不忍去步步水迴旋

其八

瀑急殷雷霆山空遠早聽忙攜邛竹杖共倚曇花亭巖  
峻波層湧泉奔勢不停橫撐鼇背仄萬丈注滄溟

其九

未盡觀濤興迢迢望上方雪消三峽遠河落九天長怒  
吼喧終古寒噴蕩混茫龍湫曾過眼奇絕足相當

其十

不識萬年寺山迴曉岫迷煙中隨鳥影竹外聽猿啼樹  
臥崩崖曲藤垂斷磻低風輕清梵近緩步石林西

其十一

空亭容攬秀臺據八峰間十抱青松古孤飛白鶴閑香  
風飄野圃霜月冷禪關贈我枯藤好巉巖暢倚攀

其十二

一臥通禪偈掉頭問去蹤桃源仙境失華頂白雲封杖  
笠何年再煙巒託興濃征途向天姥剡水碧溶溶

張聯元

鍾祥人字覺菴康熙辛未進士由吏部郎中知台州府

天台雜詠

深谷堪避暑松風時相送瀑聲入夜寒不亂山人夢抱  
膝詩一吟對月琴三弄置身羲皇間舒嘯疑鸞鳳

其二

天台薄青霄勝概誇宇宙特闢東南竒欲與蓬閩鬪石  
梁如懸虹霞城如錯繡樹色碧鬚眉嵐氣生衣袖尋仙  
鶴可招礪齒石堪漱鳴鳥不識名靜覺絲桐奏擬之神  
仙窟此言良非謬塵鞅未解脫清夢依巖竇

王

燾

錢塘人字微遠康熙丁丑武進士

天台山吟

震旦東南山水奇天台卓立滄海澗秋爽高樹偶相拉  
笑策蹇衛更扶藜十里松陰團月色冷翠寒花破岑寂  
八峰雙澗景悠然當時饒舌豐千憶千尺銀河掛石梁  
飛珠噴玉落空蒼僧閒却指曇華址宰相空畱偃月堂  
鳥道盤迴陟脩嶺天扉咫尺來華頂錢塘宛在剡曉聞  
回首鄉園悵萍梗從容緩步入桃源徒見三春花事繁  
雙姝肯向劉郎約可惜仙緣半載淪道詮曾記金庭蹟  
仙人往往居桐柏摩娑擇木韓公碑矯矯直齊程邈力  
瓊臺雙闕天中起伏坐盤陀弄焦尾一彈再鼓聲泠泠  
鯨魚潛聽深壑底沼西又望赤城霞玉京瑤草與琪葩

却訝峻嶒同絳堞山來此地饒丹砂昔人詞筆稱雄霸  
夢遊遙想殊增價我無競病敢諧聲聊譜狂吟入詩話

裴

璉

慈谿人字殷玉康熙乙未進士翰林院庶吉士著有橫山集

題顏邇玉天台山賦後

快讀天台賦重聞擲地聲三春飛瀑水萬里見霞城不  
負登臨興還餘屈宋情知文兼論世華頂應題名

顏允珏

天台雜詠

物色誰從空谷回還憐勝地半蒿萊重巖蘿薜情俱遠  
六院煙霞跡已埋詩許寒山畱石室名惟司馬在丹臺

幽懷竚立斜陽久還擬擔簦去復來

路入天台總不凡松風雲影濯青衫因聞海眼窮三井  
爲愛霞城到兩巖碧嶂已經成舊識黃精尚可託長鑱  
還元更有奇書在雲徑深深索一函

陳清鑑

錢塘人字見滄

### 天台山歌

台嶽青蒼何代闢鴻濛遙睇滄溟窄水複山重好臥遊  
振衣攀葛饒今昔暮北朝南西復東石笋摩挲憑足跡  
陰陰忽聽吼松濤古寺叢林知不隔磴道非無鳳羽棲  
礪泉尚有龍泓瀉洄洑驚看影自雙風送淪漣峰倒碧

穿雲躡頂萬八千郁郁紛紛齊過脊出岫焉知入岫心  
降魔塔畔餘几席晞髮殷勤日未晡殘暉挂壁光相射  
欲落赭盤混沌紅旋開冰鏡團圓白却就仙臺憩崿根  
中天闕聳巒岼劇徙倚思凌丹桂枝斧柯擬效吳剛壁  
卽險追隨桐柏間俯視峻嶒蕩魂魄矧乃扶筇度石梁  
瀑布喧虺聲霹靂珠簾亂卷不可留要作滄波窮海脈  
猿鳴鶴唳祇堪疑窳窳玲瓏猶待索洞接飛樓劔玉京  
朱霞散綺城爲赤白晝寧無春睡人紫煙詎乏晨餐客  
洗腸煉藥出其旁賦才寧止鏗金石美景誰耽雪後天  
亞竹欹橋寒更坼江上漁篔酒半酣仙家雞犬雲全適

一見欣教劉阮倫花霏桃浪春風宅乾坤名勝幾盡探  
靈越居然冠什百我獨從之忘世情愛訪金芝兼玉液  
飲啜能令顏色丹肥人豈必皆糠覈漢臯倘許珮相貽  
洪崖漫與肩頻拍

梁清格

鍾祥人字書城

### 天台山中

雲從山中來客向白雲去白雲不可畱欲訪藏丹處

陳象曦

慈谿人字曙升

### 望天台山

散步平原外晴波似鏡開遙從仙嶂落近和白雲來峭



壁情如抱滄江勢不回漁舫如有便早晚溯天台

陳濤 錢塘人字月江

天台道中

徑轉林窮見水濱  
名山處處絕風塵  
行經幽壑疑無路  
開遍琪花別有春  
古洞日斜歸野鶴  
石梁雲起集仙真  
平生早負居山癖  
欲訪桃源舊主人

過天台未得遊石梁

半生魂夢憶天台  
採藥劉郎今始來  
滿地白雲人跡杳  
插天丹嶂鳥飛回  
曾傳芝草當巖長  
不見桃花絕澗開  
咫尺仙源無路到  
更從何處覓丹臺

釋貫休

送道士歸天台

道高畱不住別去更何云  
舉世皆趨世如君始愛君  
徑侵銀地滑瀑到石城聞  
他日如相憶金桃一爲分

天台山

重重太古色濛濛  
花雨時好峰行不盡  
流水語相隨  
黑壤生紅木黃猿引白兒  
因思石橋路曾與道人期

釋元清

遊天台

未識台山路今從谷口行  
石梁跨澗出華頂削天成  
秋

老鴻無信風高葉有聲  
下方憑眺處一片暮雲生

釋松圃

暑月憶天台山

天巖石室居誰卜  
竹裏茅蓬膝可安  
最是瀑飛千仞雪  
夢魂猶覺石梁寒

其二

幾重金闕凌雲峻  
一壑松風拂面低  
煩想胸中從此釋  
開襟還許濯靈溪

釋大經

秋晚歷遊台山

平田風日自悠悠爲愛楓林結勝遊  
雪瀑千尋天設險  
瓊臺三面月橫秋  
霜飛寒夜鐘聲遠  
松倚青霄鶴夢幽  
瓶鉢有緣隨處宿  
何須再爲訪丹丘